

Immikkut ittumik suliniutit meeqqanik inuusuttuaqqanillu sumiginnaasarnerup annikillisarnissaanut pingaartumillu angajoqqaatut akisussaaffimmik erseqqissaanissamut tunngasut ingerlanneqarsinnaanerit pillugu apeqquteqaat aallaavigalugu Inatsisartut oqallinnissaannik siunnersuut.

(Inatsisartunut ilaasortaq Anthon Frederiksen, Partii Naleraq)

Akissuteqaat

(Ilaqutariinnut, Naligiissitaanermut, Isumaginninnermut Inatsisinillu Atuutsitsinnermut Naalakkersuisoq)

Qutsavigissavara Anthon Frederiksen, qaqqimmagu isumaginninnikkut oqallisissaq pingaartoq.

1993-imi Kalaallit Nunaata ilannguffigaa FN'ip Meeqqat pillugit isumaqatigiissutaa, ilaatigut nalunaartoq angajoqqaat akisussaaffigigaat meeqqat toqqissisimanissaat ineriartornissaallu.

Naalakkersuisut politikkiat isumaqatigiissut naapertuulluinnarpoq. Ilaqutariit tassaajuassapput meeqqat toqqissisimaffiisa ineriartorfiisalu pingaarnersaat. Pædagogit, psykologit allallu ilinniarsimasartik naapertorlugu sullissisut angajoqqaanik inangiisnaannngillat, tassami pisortat suliffeqarfiutaasa imaluunniit ilinniagallit angajoqqaat meeqqallu imminnut atanerat taarsivissinnaannngimmagu.

Naalakkersuisuni isumaqatigilluinnarparput ilaqtariinnermut politikki aqutugalugu angajoqqaat meeqqamut nunarsuarmioqataalersitaminnut akisussaaffiannik qaammarsaanissaq. Akisussaaffik taanna inuit akisussaaffigilersakkatta annersaralugulu pingaarnersarigunarpaat. Taamaattumik Naalakkersuisut ilaqtariinnut sullissivinnut ilaqtariinnullu højskolinut tapiisarnertik qaffatsippaat, soorlu aamma nuna tamakkerlugu angajoqqaat akisussaaffiannik qaammarsaanerup NAKUUSAp suliniutit ingerlatereerai.

Pingaaruteqartorujussuuvoq angajoqqaajulluta ilisimaqqissaassagipput tassaagatta qitornatta qanoq inuuneqarnissaannik maligassiuisut pingaarnersaat. Meeqqat angerlarsimaffimmini misigisatik ilinniarfigisaqaat, assersuutigiinnarlugulu ataataq anaana annersittaraa isigisarunikku taava pissuseq taanna inersimasunngornermini ingerlateqqiinnaratarsinnaavaat. Aamma oqaanneqaralarunilluunniit pissuseq taanna ileqqussaannngitsoq. Meeqqammi isigisatik ilinniarfigalugit malittarpaat.

Angajoqqaani tunniusimallutillu nakkutiginnittuni peroriartorneq meeqqap nunarsuarmi tatigeqatigiiffiusumi, imminut naleqartilluni nakuullunilu peroriartornissaanut toqqammavissat siullersaraat pingaarnersaralugulu.

Ajoraluartumilli takussaavallaarpoq angajoqqaat akisussaaffimmik tassangga sumiginnaasarnerat, pisortallu angajoqqaat sinnerlugit sulisariaqalersarnerat. Tamatta nalunngilarput meeqqat inuusuttullu sullinneqarneranni annertunerusumik qanoq iliuseqartoqartariaqartoq. Uppernarsaatissanut ilaapput nakkutilliilluni pulaartanerit ukiuni kingullerni ingerlasartut aamma MIO'p nalunaarusiai, tusagassiorfitsigut issuarneqarluartartut. Naalakkersuisuni politikikkut piumassuseqarnerput takutipparput qitiusumit siunnersuisarfimmi pilersitsigatta meeqqanut tunngasunik sulisumik aamma kommunit

isumaginninnikkut nakkutiginninnerat nukittorsarparput ilinniakkatigut qaffassaanikkut, kiisalu meeqqanut tunngasunik suliartaqassatillugu malittarisassat sukateriffigalugit.

Taamaakkaluartoq suliassarput siunitsinniittoq suli annertoqaaq. Ilaatigummi saqqummertoqarpoq sullissisut ilaat inuup ataatsip naammassisinnaasaanit amerlanerit suliassaqtartut. Kommunini inunnik sullissisut artukkerneqarsimapput, taamaattumillu kommunit peqatigalugit pilersaarusiortariaqarput qanoq iliorluta nammatassaat ikilineqarsinnaanersut, taassumalu saniatigut piukkunnartunik sullissoqarniarnerput qanoq patajaallisarsinnaaneripput. Tassami ilinniartitsinikkut suliavut iluaqutaassanngillat atorfillit suliassaqarpallaarnertik pillugu qimaaginnartassappata.

Naggataatigut oqaatigissavara Naalakkersuisut uani ataatsimiinnitsinni meeqqat ikiorserneqartarnissaat pillugu Inatsisartut inatsisissaannik saqqummiussaqaammata. Siunnersuutip siunertaraa meeqqat pisinnaatitaaffiisa piorsaaviginissaat, kommunillu iliuuseqarnissamut periarfissaasa nutarsaaviginissaat. Inatsisissamut siunnersuummut ilaavortaaq kommunit inatsisitigut toqqammavissinnissaat angajoqqaanik peqqusisarnissamut, soorlu assersuutigalugu angajoqqaat qitornaminnik kaannatik qasuersimallutillu atuariatortitsisarnissaannik peqqusisinnaanissaat. Inatsisissamut siunnersuutittaaq pingaartitaanut ilaavoq angajoqqaat qitornallit namminneq qitornamillu ajornartorsiutaannik aqqiisarnissaat, tassa akisussaaqataanermik ersersitsisarnissaat.

Taama oqaaseqarlunga oqallilluarnissassinnik kissaappassi.